

Kayëta ixinëm ir 'Bëtesalonik in

Lilaya in

Akayëta aŋo ro Pol yëgwën babi bëte okëreceŋ od gër Amara and Tesalonik ok. Ebi pënixën ŝenene end omakaw ond Yesu Kërisët eŋ. Okëreceŋ odëmar na gër Tesalonik, abani riyenind na gayik gogo ko bakaw Yesu Kërisët. Ebi wërëŝëtaxën, Pol yëgwën këbi mëne damana exo bakaxënëgu Yesu Kërisët, beŋo kë xuca pere gër ngwën: eyëpan ed ekwëta ed Kaxanu el; gë cale ind enëgwëŝ in; gë eñëmbër ed betëmbak el; gë ecanayaw ed Arangoyëra and *Kërisët el. Do gayikako beŋo ax gi bana pere, okëreceŋ ok aŋap yap bax eni bayi ga këni riyenind këdi këno sëkwëran ala aŝëxe edëba edebën el.

Er ex gër akayëta in:

End ekemëna ed gër andiyen and Kaxanu eŋ: 1.1-12.

End eyëpan ed Atëfëtan and Yesu Kërisët eŋ: 2.1-12.

End ekwëtaya ed Atëfëtan do gë cale eŋ: 2.13-3.5.

End bërëwäk bëxwëlaraxik eŋ: 3.6-15.

Ofelar ol: 3.16-18.

Ecëmar el

1 ¹ Wëno Pol, gë Silas, do gë Timote këjun yëgwënëlınd. Aŝëma këmun ŝëmand wën bër gër Amara and 'Bëtesalonik bën, amara and xwën këni Kaxanu Faba irebi do gë Axwën *Yesu *Kërisët aŋ. ² Awa Kaxanu, Faba irebi do gë Axwën Yesu Kërisët, yëlëlenun oyekax ol do gë obetak ol.

End yatir kiti eŋ

³ Bëmaŷe, cëkwayindëlemo din Kaxanu endewën eŋ. Mondako yapëk gayikako ekwëta ed xwëta këno wën el do gë ebalër ed këjun balërënd el anëka dëŋ kë rafënd. ⁴ Biyi cëŋ gë onënga fo këmi reyarand endewën eŋ gër bamara band Kaxanu gayik wën and mokemëna xemëna kën gër ekwëta. 'Bëte abuŋa buŋa kën ado ga rixëra kënun, do soro kën mbaŋ. ⁵ Toro ind kën sorond iŋo këbo wäsinënd mëne Kaxanu ŝenene ko xitind, do mëne wën bër yap këbi en gi gër owun or Kaxanu hi kën. Ata në end owun olo kën soroxënënd. ⁶ Enimin Kaxanu end ŝenene ko ri, aŷaŝën këbi wäŝën toro iŋ bër këjun sorënënd gërëgako bën. ⁷ 'Bëte ŝenene fo ko ri ga racët racët këjun gër toro ene teyëtaxëne wën gë

biyi yatir këni şanayaw elod gër orën gë panga inj, Axwën Yesu do gë omeleka odexëm ok. ⁸ Er këni şanayaw gë angodux atëm enëbi nëpaxën bër aŋo nang ex Kaxanu bën, do gë bër hëpëk eni ma end Atëfëtaŋ and *Yesu, Axwën arebi bën. ⁹ Ata kiti ind yap këbi inj dëŋ këbi hatënegu: laŋ këbi yana ebi bëlandërand, do eno nacëta din ir din Axwën an, mëŋ ar gë panga ind gë enjaran an. ¹⁰ Eŋo kë hi yatir ko bakaw. Ata aşëkw këno yana eno cëkwënd bëwëwëk bërexëm bën, dek bër wak endexëm bën ayas këno yana eŋo yasënd. Ahixeli kën hixelid ga wa kën ako end Kërisët eŋ and wël kën osede orebi aŋ.

¹¹ Mëŋ ex, biyi din këmun şalenënd. Axara këmo xarand Kaxanu, mëŋ ar xwën këbo an, eŋun dëca eni gi bela bër yap këbi aniyand and waceli këŋun aŋ. Axara këmo xarand bëte eŋun dëca gë panga indexëm inj en koraxënënd en di oyekax or ex yo, do andiyen and gë ekwëta and ex yo. ¹² Ata bela bën në endewën këni şëkwaxën oŋac or *Yesu, Axwën arebi ol, do enun pëb wën bëte në endexëm. Mondako kë hi beŋo dek në end oyekax or Kaxanu do gë Axwën Yesu Kërisët.

End emëş epelatar eŋ

2 ¹ Axara xara këmun bëmaŋe, end yatir ko bakaw Axwën *Yesu *Kërisët eŋ do ang këne barëre ler gër ndexëm ak këmun xarand, ² këreŋun yebud na aŋand gër onden ondewën. Ado enun pelënd mëne akey and ko bakaw Axwën Yesu aŋ anëka hatëguk ba enun pelënd mëne Kaxanu rek, eŋo këreŋun tesënëd na. Bëte ado enun mëlanëli kayëta do eni dend mëne biyi yëgwënëli këŋun, eŋo këreŋun tesënëd na. ³ Ala këreŋun yifad na gë təkërak. Gayikwa afo ex gi pere beki beŋo: eŋanar eŋ, bela bën eno mëşëndëra xali Kaxanu; ekinëm eŋ, exo canayaw Aŷëŋënaŋ an, ar fab këŋo enemi an. ⁴ Aŋaŋëreli ar Kaxanu an exo do ayepën ko yepënënd dek er këni xëland bela in. Mëŋ ex ar kë yëxw exo nëpa gër lëngwe gër Aciw and Kaxanu do exo dend Kaxanu hi ko an. ⁵ Kwitayin mëne afël bamun felënd eŋo and yeli bame gër ndewën aŋ. ⁶ Wën aye nang kën er wedi këŋo gërëgako in, barikan aşanaya ko şanaya and kë hat akey andexëm aŋ. ⁷ Awa anëka yanak kë şanayand eŋëŋënaŋ end şonaya bax eŋ. Barikan afo exo dëxëta pere ar këŋo wedind gërëgako an, ex canayaxën kerët. ⁸ Amëd aŋo fo ko şanayaw Aŷëŋënaŋ an, do Axwën *Yesu eŋo daw gë onjën ond kë şanënd gër etëy edexëm oŋ, yatir ko bakaw. ⁹ Er ko şanayaw Aŷëŋënaŋ ajo gë panga ind Sindan inj dek, exo dind becarax, bananganëme, do gë bërëcaxik bend ex yo ebi yifaxënënd bela bën. ¹⁰ Gë dek banjifa band osëmbak baŋ këbi

ÿana ebi nañjëtënd bër nambërak bën gayik ani kwëtaya ex na gër oŵëkw añana and ðal and fexën dobi añ. ¹¹ Mëñ ex, Kaxanu këbi laŵëneliw panga ind kë nambelind iñ eni kwëtaxënënd enëgwëŵë enj. ¹² Ata në eño këbi nëpaxën Kaxanu ðek bër hëpëk eni kwëta ðal bën, do bër këbi nënganënd edi ed betëmbak bën.

End apexa enj

¹³ Biyi cëñ, end wën bëmaÿe bënd ðan këñun Axwën bëño, aÿap ÿapëk mo cëkwand din Kaxanu. Gayikwa Kaxanu sana këñun en gi bëÿanar gër apexa, gër oŵënëk or ko yëlënd Angoc Amënëk ol, do gër ekwëta ed ðal. ¹⁴ En gixën mondako ŵac këñun gë Atëfëtan and nangën këmun añ, en cotaxën bëte enjaran end Yesu Kërisët, Axwën arebi enj. ¹⁵ Awa bëmaÿe, ðëkayayin aye do tëfindën lañ bend sëÿali këmun hik gë etëÿ el, hik gë kayita ir ÿëgwënëli këmun in.

¹⁶ Yesu Kërisët, Axwën Arebi an dëñ, do gë Kaxanu Faba irebi, mëñ ar ðan këbo an, mëñ ar yël këbo në end oyekax orexëm ene cot ex eyar ejakax do gë ekapina ed din ir din an, yëlëlenun, ¹⁷ ojaŵ ok en kemaxën gër oŵëkw gër edi ed enjekax end ex yo do en yeÿanaxënënd enjekax end ex yo!

End cale enj

3 ¹ Bëmaÿe, end këme xor me de me ñataxën enj ex, calenindënëbo biyi ex wëlixën nëmëc eyey'an ed Axwën ed këmi femërand el, do eni cëkwaxënënd bela bën ang gër ndewën ak. ² Karayindëno bëte Kaxanu ebo dacët gër otaxan od bela bëxeÿax do bëÿëñenax, gayikwa ax gi ex na ðek fo ŷot këni ekwëta el.

³ Axwën an cëñ mokwëta hi ko. Axemën këñun xemën do axaxa këñun xaxa enjun beŷaxën Aÿëñenax an. ⁴ Ga bar këmi gë Axwën an fënixën këbo mëne wën në edi en, do ari këñ ri bëte er këmun felënd in. ⁵ Axwën an wërëŷëtëlexo oŵëkw orewën oñ gand añana and Kaxanu do gër ebuña ed ko yëlënd.

End andiyen enj

⁶ Ga re këmi bëmaÿe, gër oŵac or Axwën Yesu Kërisët, nacëtayino imaÿe indewën ikwëlaraxik iñ xarak ax gi ex na ang sëÿali këmun biyi ak. ⁷ Wën dëñ anang nang këñ ang ÿapëk enëbo tëfëtelind ak gayik ami kwënda bana oxwëlar and hi bami gër ndewën añ. ⁸ Ciŷ wec bami riyenind këdi ko soro ala eðëba edebi el xarak ami tëŵ ex na gë andebi dëñ mi ÿambëraxën. ⁹ Biyi dëñ ÿandi babo mi ðiyand mondako enëbo tëfëtelixënënd xarak

enimin aḡap ḡapëk enëbo dëband. ¹⁰ Enimin, and hi bami gër ndewën aḡ, afel bamun felënd: «Angëmëne ala eḡo key andiyen aḡ, awa kërexo ḡambërand na.»

¹¹ Xarak anangati nangati këmi mëne na gër ndewën bërëmar bëxwëlaraxik exëni, ḡoweḡ ani dind na ang ax gi ex na edilaya ed gër bend abi paḡ ex na el. ¹² Ata bëḡo këmëni rend de, gër oḡac or Axwën Yesu Kërisët, xara këmëni: diyenindëlexëni ang ḡapëk ak eni cotaxën eyamb ed sëw këni gë andebën dëḡ el.

¹³ Wën cëḡ bëmaḡe, këren tëkwëra na edi ed ang ḡapëk el. ¹⁴ Do angëmëne ala exëna ar hëpëk er ḡëḡw këmi gër kayëta iḡo ro an, tisino aye, do këreno baraḡ na eḡo cëfënanaxën. ¹⁵ Pelërayino ang imaḡe indewën fo, bari këreno nacëta na ang arangoḡëra andewën fo.

Ofelar ol

¹⁶ Axwën an, mëḡ ar gë obetak an, yëlëleḡun mëḡ dëḡ obetak ol, nand ex yo, do ang ex yo! Awa Axwën an gilexo gë wën dek.

¹⁷ Ofelar ol cëḡ, wëno Pol ḡëḡwëlik gë ataxan andam aḡ dëḡ. Mondako këme hatand dek okayëta band këme ḡëḡwënd baḡ.

¹⁸ Yesu Kërisët, Axwën areḡi an, yëlëleḡun wën dek oyekax ol!